

प्रादेशिक समाचार

दिनांक 30.03.2024

समय: 18.45 बजे

- राज्य मांय लोकसभा चुनाव रा पहला दौर मांय नाम वापसी री मियाद पूरी व्ह्या पाछे 12 सीटां माथे 114 उम्मीदवार मैदान मांय-सब ऊं बत्ता 15 उम्मीदवार जयपुर ग्रामीण अर सब ऊं कम चार उम्मीदवार करौली-धौलपुर सीट माथे ।
- राष्ट्रपति द्रौपदी मुर्मू पी.वी नरसिम्हा राव, चौधरी चरण सिंह, एम एस स्वामीनाथन अर कर्पूरी ठाकुर ने देवलोक व्ह्यां पाछे भारत रत्न ऊं नवाजा ।
- प्रदेश रा 75 वां स्थापना दिवस रे मौके आज धूम-धाम सागे कार्यक्रम राख्यी ज्या ।
- मौसम विभाग आज जयपुर, जोधपुर, भरतपुर अर बीकानेर संभाग रा 11 जिलां मांय जोरदार बायरो बाजण सागे बीजळी पडबा सारू चेतायो ।

000

राज्य मांय लोकसभा चुनाव रा पैला दौर रा तैत 12 सीटां माथे 114 उम्मीदवार चुनाव मैदान मांय है । राज्य रा मुख्य चुनाव अधिकारी प्रवीण गुप्ता बतायो के आज सीकर अर दौसा लोकसभा हलकां मांय 2-2 अर जयपुर, अलवर अर नागौर हलकां ऊं 1-1 उम्मीदवार पर्चा पाछा ले लीना । गुप्ता बतायो के पैला दौर रा चुनाव सारू नाम पाछा लेवण री मियाद आज पूरी व्ह्यां पाछे अब सब ऊं बत्ता 15 उम्मीदवार जयपुर ग्रामीण लोकसभा हलका ऊं चुनाव लड़ रह्या है । सब ऊं कम 4 उम्मीदवार करौली-धौलपुर सीट ऊं चुनाव मैदान मांय है । निर्वाचन विभाग रे मुजब सीकर मांय 14 उम्मीदवार चुनाव मैदान मांय है । जयपुर अर चूरू मांय 13-13, गंगानगर, बीकानेर, अलवर अर नागौर मांय 9-9, झुंझुनूं मांय 8, भरतपुर मांय 6 अर दौसा मांय 5 उम्मीदवार चुनाव मैदान मांय है । लोकसभा चुनाव रा पैला दौर रा तैत राज्य मांय 12 सीटां माथे 19 अप्रैल ने वोट पड़ेला ।

000

लोकसभा चुणाव सारू राज्य मांय हाल ताई 218 पर्चा दाखिल करी ज्या है । निर्वाचन आयोग ऊं मिली जाणकारी रे मुजब आं मांय 13 पर्चा नामजूर कर दिया ज्या जद के 10 पर्चा पाछा जे लिया ज्या । ई बीचे प्रदेश मांय लोकसभा चुनाव रा दूजा दौर सारू नामपाना दाखिल करण रो काम चाल रह्यो है । जोधपुर ऊं भारतीय जनता पार्टी रा उम्मीदवार गजेन्द्र सिंह शेखावत अर कोटा ऊं कांग्रेस रा उम्मीदवार प्रहलाद गुंजल आज नामपाना दाखिल कीना । उदयपुर ऊं कांग्रेस रा उम्मीदवार ताराचंद मीणा ई आज पर्चा दाखिल कीनो । चित्तौडगढ़ मांय ई दो उम्मीदवार पर्चा दाखिल कीना । लोकसभा चुनाव रा दूजा दौर मांय 4 अप्रैल ताई पर्चा दाखिल कर्या जा सके है । आं पर्चा री 5 अप्रैल ने जांच करी जावेला अर नाम 8 अप्रैल ताई पाछा लिया जा सकेला । ई दौर मांय राज्य री 13 सीटां सारू 26 अप्रैल ने वोट पड़ेला । ई बीचे प्रदेश मांय चुनाव प्रचार ई जोर पकड़बा लाग्यो है । आज राज्य रा उद्योग मंत्री राज्यवर्धन राठौड़ दौसा लोकसभा हलका मांय जनसभा कीनी ।

000

लोकसभा चुणाव पूरी साफ़गोई सागे करावण सारू प्रशासन सगळा ज़रूरी जतन कर रह्यो है । बाड़मेर लोकसभा हलका मांय उम्मीदवारां रा चुणाव खर्च माथे निगराणी राखण वाळा अहलकार सतीश वी मेनन आज सूचना केन्द्र मांय एकीकृत नियंत्रण कक्ष रो दौरा कर र सोशल मीडिया, नियंत्रण कक्ष, सी-विजिल अर एमसीएमसी प्रकोष्ठ रा कामकाज रो जायजो लीनो अर ज़रूरी हुकम दीना । सांचौर रा ज़िला निर्वाचन अधिकारी अर एस.पी. रानीवाड़ा पंचायत समिति री दर्ईपुर, गांग अर हीरपुरा ग्राम पंचायत अर सरनाऊ पंचायत समिति री नारायणपुरा ग्राम पंचायत रा मतदान केंद्रां रो औचक दौरा कर र व्यवस्थावां रो जायजो लीनो अर मतदान केन्द्रां माथे बिजली, पाणी, छाया, शौचालय अर दिव्यांग मतदातावां सारू रैम्प हिफाजत रा पुख्ता इंतजामात् समेत न्यारा-न्यारा सुबीता तैय करावण रा हुकम दीना । आज हनुमानगढ़ जिला रा मतदान दलां रो दूजो रेंडमाइजेशन करी ज्यो । ई बीचे डूंगरपुर जिला रा सागवाड़ा मांय पुलिस नाकाबन्दी रे दौरान पैदल जा रह्या एक जणा ऊं करीब पौने सत्ताईस लाख रुप्या री नकदी अर 8 किलोग्राम 392 ग्राम चांदी रा गहणा जब्त कीना जिण रो पकडी ज्यो लोग कोई संतोषजनक जवाब नी दे सक्यो । पुलिस पकडी ज्या आरोपित ऊं पूछताछ कर रही है । बीकानेर रा बीछवाल थाना हलका मांय ई एक जणा ने 57 लाख रुप्या री नकदी सागे पकडी ज्यो ।

भारतीय जनता पार्टी लोकसभा चुनाव सारू चुनाव घोषणा-पत्र समिति बणायी है। भाजपा रा अध्यक्ष जगत प्रकाश नड्डा आज ओ ऐलाण कीनो। वे बतायो के पार्टी रा नेता राजनाथ सिंह री अगुवाई वाळी 27 सदस्यां री ई समिति मांय निर्मला सीतारामन संयोजक अर पीयूष गोयल ने सह-संयोजक बणायी ज्या है।

000

लोकसभा चुणाव मांय बत्ता ऊं बत्ता मतदातावां री भागीदारी तैय करण रा मकसद ऊं राज्य मंय न्यारा-न्यारा कार्यक्रम राख्या जा रह्या है। जालौर जिला रा भीनमाल, तवाव, लूणावास अर राह समेत केई ग्राम पंचायतां मांय लोक नृत्य अर लोकगीतां रे मार्फत वोट जरूर देवण रो संदेश दियो ज्यो। सांचौर मांय फाग री धुन माथे नाच-गाण रो कार्यक्रम राख र वोट देवण रा बारा मांय जाग जगायी ज्यी। ई मौके मतदाता जागरूकता गीत 'वोट देवणो है' रे मार्फत वोट जरूर देवण री अपील करी ज्यी।

000

लोकसभा चुनाव मांय वोट देवण बाबत् जाग जगावण सारू आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है

नागौर जिला रा रियाबड़ी रा नौरत राम सुवासिया.रो संदेश ।

000

राष्ट्रपति द्रौपदी मुर्मू आज राष्ट्रपति भवन मांय राखी ज्या जळसा मांय पैली वाळा प्रधानमंत्री पी.वी. नरसिम्हा राव अर चौधरी चरण सिंह, कृषि वैज्ञानिक एम.एस. स्वामीनाथन अर बिहार रा दो दफा मुख्यमंत्री रह्या कर्पूरी ठाकुर ने देवलोक व्ह्या पाछे देश रा सब ऊं ऊंचा नागरिक मान भारत रत्न दे र नवाजा। भारत रत्न मान देवलोक व्ही हस्तियां रा पिरवार वाळा लीनो। ई मौके उपराष्ट्रपति जगदीप धनखड़ अर प्रधानमंत्री नरेंद्र मोदी समेत केई मान्योडां लोग मौजूद रह्या। राष्ट्रपति रो काल पैली वाळा उप प्रधानमंत्री लालकृष्ण आडवाणी ने भारत रत्न मान ऊं नवाजण रो कार्यक्रम है।

000

आज प्रदेश रो स्थापना दिवस राजस्थान दिवस रा तौर ऊं मणायो जा रहयो है। साल 1949 मांय न्यारी-न्यारी रियासतां ने मिला र राजस्थान राज्य बणायी ज्यो हो। ई मौके राष्ट्रपति द्रौपदी मुर्मू, प्रधानमंत्री नरेन्द्र मोदी, उपराष्ट्रपति जगदीप धनखड़, राज्यपाल कलराज मिश्र अर मुख्यमंत्री भजनलाल शर्मा जनता ने शुभकामनावां दीनी। ई मौके राज्य मांय न्यारी-न्यारी ठौडां खास कार्यक्रम राखी ज्या। झुंझुनूं रा राजकीय राधेश्याम मोरारका पीजी कॉलेज मांय संस्कृति मंत्रालय री ओर ऊं लोक नृत्यां री होड राखी ज्यी। होड मांय झुंझुनूं, चिड़ावा, नवलगढ़, सूरजगढ़ अर खेतड़ी समेत न्यारी-न्यारी ठोडां ऊं स्कूल-कॉलेजां रा विद्यार्थी सिरकत कीनी। ई मौके मौजूद लोगां ने वोट देवण री शपथ दिरायी ज्यी। भरतपुर रा केवलादेव राष्ट्रीय उद्यान मांय आवण वाळा सैलाणियां रो शहनाई बजा र अर टीको लगा र स्वागत करी ज्यो। म्हाणा खबरनवीस बतायो के ई मौके राजकीय संग्रहालय मांय ई सैलाणियां अर विद्यार्थियां ने मुफ्त घुमायी ज्या अर संगोष्ठी राख र राजस्थान रा इतिहास री जाणकारी दीरीजी।

करौली अर भीलवाड़ा जिला मुख्यालयां माथे ई केई सांस्कृतिक कार्यक्रम राखी ज्या। बूंदी मांय चौरासी खम्भां री छतरी माथे कच्छी घोड़ी नाच अर राजस्थानी गीतां रो कार्यक्रम राखी ज्यो। श्रीगंगानगर मांय राजस्थान दिवस रे मौके लोकसभा चुनाव मांय मतदातावां री बत्ती ऊं बत्ती भागीदारी बाबत् जाग जगावण रा मकसद ऊं रंगोली बणायी ज्यी। झालावाड़ मांय गागरोन किला, खेल संकुल अर झालरापाटन रा सूर्यमंदिर अर द्वारकाधीश मन्दिर मांय बिंदौरी, कालबेलिया अर घूमर समेत न्यारा-न्यारा कार्यक्रम राखी ज्या।

ई मौके लोकसभा चुनाव मांय बत्ता ऊं बत्ता मतदातावां ऊं वोट जरूर देवण री अपील करता थकां रैली निकाळी ज्यी। हनुमानगढ़ रा सेंट्रल पार्क मांय पर्यटन विभाग री ओर ऊं सांस्कृतिक कार्यक्रम राख र वोट देवण बाबत् जाग जगायी ज्यी। जयपुर रा जवाहर कला केन्द्र मांय आज सांस्कृतिक संध्या राखी जा रही है।

000

राज्य मांय लारला 24 घंटां मांय कठे-कठे हल्की बिरखा ऊं गर्मी ऊं थोड़ी साता मिली। मौसम विभाग रे मुजब मनिया, बाड़ी, कोटा, रायसिंहनगर, श्रीगंगानगर, अनूपगढ़, करणपुर, सादुलशहर, संगरिया अर आरे-सारे रा हलकां मांय छांटो-छिड़को व्ह्यो। ई बीचे मौसम विभाग आज जयपुर, भरतपुर, जोधपुर अर बीकानेर संभाग रा 11 जिलां मांय जोरदार बायरो बाजण सागे बीजळी पडबा अर हल्की बिरखा रा आसार जताया है। ई बीचे उनाळा री सरूआत सागे ई राज्य मांय आंगनबाडी केन्द्रां रा काम रो बगत संवारे 06:00 बज्यां ऊं दोपहरां 12:00 बज्यां ताई कर दियो ज्यो है।

000